



Sujet 2017:

Umbau Kantonalbank - Chrüzig

Mir hätte gärn e Kreisel an der KB-Chrüzig gha.

Bym Umbou vo der Rhystrooss sy mir jede Daag in de Kolonne gschtande, hai Umleitige gfaare und vill Moscht verbruucht mit eusem Chaare.

Wenn mir denn so Richtig Kantonalbank-Chrüzig gfaare sy, hai mir vill Zyt gha zum dröime wie schön das wär, wenn uusem „GPS“ die vertrouti Stimm würd säge „Nach 100m im Kreisel die 1. Ausfahrt nehmen“ und scho wäre mir Richtig Baanhof oder Oristal underwägs.

Aber statt em Kreisel hai mir e neuji Liechtsignal-Aalag mit Ample übercho und müesse wyterhi minutelang in der Kolonne stoo und warte bis mir euse Chaare wiider chönne starte.

Do chasch wüürklig säge: „s isch halt nur es chlyses Dröimli gsy, Dröimli sy halt doch so schnäll verby!“

Au in der Politik wär e Kreisel e Hit, wills eifach zvill Sässelchlääber git. Dene chönnt me klar und dütlig säge: „Nach 2 Jahren im Kreisel die 2. Ausfahrt nehmen“ oder me chönnt eine sogar nach 1 Joor by der 1. Uusfaart wiider uuseschicke!

Au vor em Törli wär e Kreisel toll und würd super funktioniere, me müesst numme die 1. Uusfaart zuebetoniere, denn wär au d Büchelistrooss toll zum flaniere. Der Felix chönnti wyterhi dusse serviere, syni Gäscht verwööne und mit em Alphorn zuedrööne.

Für die neuji Rothuusstrooss empfääle mir gar keini Kreisel, dört muesch überall chönne dure und an jedem Egge echly mit Eim schnurre. Das git denn Läbe ins Stedtli, eusi Chrämer chönne sich freue über jede Neuje wo chunnt cho ychaufe oder bynere Beiz vorusse höckle und mit emene Bier oder em Glas Wyse s Läbe gniesse.

Öppis ganz anders bloogt eus wäge däm Rothuusstrooss-Umbou ganz bsunders.

Euse hochheilige Banndaag muess das Joor uus der Rothuusstrooss verschwinde, am Fischmäart hinde muess er starte und wird au dört beändet, mir finde do wird s Bruuchtum gschändet.

Mit echly guetem Wille und vor allem ere guete Boustelle-Organisation wär das durchuus möglich gsy, dass d Banndäägler uuf einer Stroossesyte hätte chönne uus- und ymarschiere und traditionsgemäss vor em Rothuus d Rottefaane abgee und mit em Baselbieterlied dä Banndaag 2017 beändel!

Zum Schluss nones Wort zu eus „Trotzchöpf“. Syt 35 Joor gässle mir mit Drummle und Pfyffe jedi Fasnecht durs Stedtli duure.

Das Joor s letscht Mool mit Trottoir und sunschtige Stolperfalle, s nööchscht Joor wirts eus sicher in der neuje Rothuusstrooss gfalle.

Und ganz speziell das Joor wird nid gässlet sondern „kreislet und kreislet“, mir gniesse d Fasnecht in volle Züüge und empfääle euch allne gniessets au und hait vill Spass, es isch nur eimool im Joor Fasnecht uff der Gass!

Wie allewyyl isch am Fasnechtszyschdig d Ladärne-Uusstellig in der Rothuusstrooss vom zwöi zmidag bis am nüüni oder no spööter zoobe!